

Auta distincziun academica per Clau Dermont

Surdada dal Premi da perscrutaziun da l'ambient al Dies academicus da l'Universitad da Berna

DA MARTIN CABALZAR

■ **Al Dies academicus da l'Universitad da Berna è il politolog rumantsch Clau Dermont vegnì distinguì cun il Premi da perscrutaziun da l'ambient. Cun questa occasiun ha l'Universitad da Berna era concedì ad otg persunas il doctorat d'onur, tranter auter a l'anterieur cusseglier federal Johann Schneider-Ammann.** *Clau Dermont* è vegnì distinguì per sia dissertaziun che porta il titel «Citizens support for the energy transition. The influence of policy and politics on citizens' opinion towards renewable energy promotion». En sia lavur stat la dumonda surordinada daco che burgaisas e burgais èn relevants per la transiziun tar energias regenerablas e tge facturs ch'influenzeschan las opiniuns davart quest tema. A basa da metodas innovativas e da concepts ha Dermont analisà co cuntegns politics ed arguments or da l'optica da la politica da partida influenzeschan la furmaziun d'opiniun da las burgaisas e dals burgais en ina democrazia directa.

Tenor la laudaziun munta sia dissertaziun ina contribuziun impurtanta ad ina vista adina pli relevanta che la transposiziun da systems d'energia na pon betg succeder senza resguardar dapli aspects politics e cunzunt la rolla da la populaziun pertutgada.

Clau Dermont – il politolog rumantsch

Clau Dermont è naschì 1988 e creschì si a Rueun. El ha studegià ciencias socialas e politics a l'Universitad da Berna



Al Dies academicus da l'Universitad da Berna è Clau Dermont vegnì distinguì cun il Premi da perscrutaziun da l'ambient.

MAD

(2008–2014). Là ha el acquistà 2012 il bachelor en ciencias socialas ed istorgia, 2014 il master en ciencias politics, politica svizra e politica cumparativa. Da 2015 fin 2018 è el stà doctorant en ciencias politics a l'Universitad da Berna, terminond 2018 quest engaschament cun la dissertaziun e cun il docto-

rat. Sper studi e doctorat è Dermont era stà engaschà sco gidanter studentic ed assistent a l'Institut per ciencias politics, politica cumparativa tar *Isabelle Stadelmann-Steffen*. L'onn 2017 ha el passentà sco scienziat ospitant a l'«Institut for Policy Research» a l'Universitad da Northwestern en ils Stadis Unids tar

James N. Druckman. Dapi 2019 lavura Dermont sco «Postdoc am Digital Democracy Lab» da l'Institut per ciencias politics a l'Universitad da Turitg. Ses focus da prescrutaziun èn furmaziun d'opiniuns, digitalisaziun e politica d'energia. Sco politolog vegn el adina puspè consultà da diversas medias. Clau

Dermont ha già sviluppà ina considerabla activitad publicistica, tranter auter era davart temas da la politica grischuna sco il sistem electoral, il scandal da cartels, il cumportament da votaziun dals deputads en il cussegl grond, ma en general davart la participaziun politica da giuvens creschids e da la participaziun selectiva à la carte (lavur da master) etc. E quai tant en rumantsch, tudestg ed englais. Tranter auter è Dermont era copresident da la Pro Svizra Rumantscha che dat adina puspè impuls innovativs per il moviment rumantsch.

Premi da perscrutaziun da l'ambient

Cun il Premi da perscrutaziun da Berna vegn promovì la perscrutaziun disciplinara ed interdisciplinara da la retschertga sin il sector da las ciencias da l'ambient e la persistenza a l'Universitad da Berna. Mintga dus onns vegnan perscrutadras e perscrutaders undrads per lavurs scientificas extraordinarias che portan ina contribuziun relevanta u che furman la basa per ina meglra chapientscha da l'ambient e dals problems da la persistenza resp. da lur soluziun. Distinguidas vegnan lavurs ch'interesseschan la politica, l'economia e la publicitad e che dattan impuls per la pratica. Il premi sa drizza cunzunt a giuvnas perscrutadras ed a giuvens perscrutaders. Quest onn èn nov persunas giuvnas vegnidadas distinguidas. L'Universitad da Berna engrazia a CSL Behrig SA ed ad Energie Wasser Bern che pussibiliteschan la surdada da quests premis entras lur contribuziuns finanzialas.